

Mál nr. 264/2016**M****og****vátryggingafélagið V v/ ábyrgðartryggingar orkuveitu.****Maður slasaðist á er annar fótur hans féll ofan í veitubrunn.****Gögn.**

Málskot, móttakið 29.8.2016.2016, ásamt fylgigögnum.

Bréf V, dags. 30.8.2016, ásamt fylgigögnum.

Málsatvik.

Á opinni grasflöt við gangstétt meðfram Holtaseli til móts við Hólmasel í Reykjavík er um 60 cm djúpur veitubrunnur fyrir fjarskiptavirki í eigu A, dótturfélags B. Yfir brunnum er brunnlok stept úr járn. Á morgni 12. júní 2015 var M á gangi eftir grasflötinni með hundinn sinn og steig á brunnlokið. Við það sporðreistist lokið og féll M með hægri fót ofan í brunninn en vinstri fótur krumpaðist aftur fyrir hann og hlaut hann áverka á þeim fæti.

M gaf skýrslu hjá lögreglu sama dag og slysið varð auk þess sem aðstæður á slysstað voru skoðaðar. Segir þar að brunnlokið hafi ekki sæti á brunnbarminum og ef stigið er á lokið „veldi það einfaldlega um miðasinn þannig að það opnast niður í brunninn.“

Í yfirlýsingu vitnis, dags. 18. ágúst 2016, segir að vitnið hafi farið með M að brunnum þremur dögum eftir að slysið varð. Hafi brunnlokið þá enn rambað til og frá og hefði sporðreistist ef stigið hefði verið ofan á það. Ástæðu þess að lokið hafi ekki fallið í sethring sinn hafi verið sú að mikil mold, drulla og grasgróður hafi verið komin ofan á sethringinn og allt í kringum brunnopið þannig að ógjörningur hafi verið að setja lokið í sæti sitt.

Í umsögn A um atvikið kemur fram að X hafi borist erindi frá Umhverfis- skipulagsráði Reykjavíkurborgar og leitað umsagnar um slysið. Samkvæmt umbeðinni umsögn 6. júlí 2016 er „bent á mögulegt frávík í frágang á loki á brunni í eigu [A] í gróðursvæði utan við gangstíg. Ekki sé karmur um lok.“ Samdægurs hafi aðstæður verið skoðaðar af hálfu A og við komu að brunnum hafi lok yfir opinu verið stöðugt á öllum hliðum en frekar djúpt í jarðveginum. Vegna fyrrgreindrar ábendingar hafi að morgni næsta dags verið farið í það að setja kambhring um lokið. Þá kemur fram í umsögn A að í kjölfar ábendingar vegfaranda hafi 24. mars 2014 verið farið í lagfæringar á frágangi brunnsins „og tryggt áseta brunnloks á körmum brunntoppis allan hringinn. Jarðvegur var hreinsaður frá brunnkarmi til að brunnlokið sæti tryggilega og tappar settir í göt á brunnloki.“ Hafi brunnlokið verið stillt af þannig að áseta væri örugg og jarðvegur um lokið fyllti að til varnar óviðkomandi aðgengi og verji lokið gagnvart snjóruðningi gangstíga. Við skoðun A eftir slysið hafi brunnlokið verið stöðugt og setið á karmi brunnsins. Lokið sé 70 mm stærra að þvermáli en brunnopið. Engin ummerki hafi hafi verið um galla eða skemmd né annað varðandi frágang brunnsins.

M telur að slysið verði rakið til þess að frágangur brunnloksins og eftirlit með af hálfu A hafi verið ófullnægjandi. Hefur hann krafist bóta úr ábyrgðartryggingu A hjá V vegna þess líkamstjóns sem hann varð fyrir umrætt sinn. V hefur hafnað bótaskyldu.

Álit.

Eins og að framan greinir er í umsögn X 6. júlí 2016 bent á mögulegt frávík í frágangi brunnloksins að því leyti að ekki sé karmur um lokið. Af hálfu A er það skýrt með því að rétt þótti að hafa lokið lægra en yfirborð grasflatarinnar í kringum það svo það yrði ekki til trafala við snjóruðning eða snjóhreinun. Var gengið frá lokinu á þann veg að erfitt átti að vera að opna brunninn eða hreyfa lokið úr stað nema til þess stæði einbeittur vilji. Samkvæmt gögnum málsins verður ekki ráðið að starfsmenn A hafi fengið vitneskju um slysið eða að hætta gæti stafað af brunnlokinu fyrr en 6. júlí 2016. Í ljósi þess sem hér hefur verið rakið verður ekki talið að nægilega hafi verið sýnt fram á að frágangur loksins hafi verið ófullnægjandi þannig að virt verði

starfsmönnum A til sakar né heldur að slysið verði rakið til þess að eftirlit með lokinu hafi verið vanrækt af hálfu A þannig að leitt geti til skaðabótaábyrgðar fyrirtækisins. M á því ekki kröfu um bætur úr ábyrgðartryggingu A hjá V.

Niðurstaða.

M á ekki rétt á bótum úr ábyrgðartryggingu A hjá V.

Reykjavík, 27. september 2016.

Þóra Hallgrímsdóttir lögfr.

Valgeir Pálsson hrl.

Jón Magnússon hrl.